

## **Radyo an Norvys**

(<http://www.dasunys.net/podcast.htm>)

**Titel:** Nowodhow an seythen (31/03/08)

**Auctour:** Matthew Clarke

**Dydh:** 31 Meurth 2008

**Pesyans:** 3:20

Otta ni dehwelys wosa Pask... hag ass o hager awel y'n goolyow! Gwyns krev a hwythas ha glaw poos a godhas. Ha warlergh oll a henna, pennrewloryon a'gan negys tornyaseth a lever bos an seson kosella es kyns... ha dre vras awos an gewer. Kuhudhys yw an prys keffrys. Dell grys tus kepar ha Visit Cornwall... ny wrug tommals a dornysi dos omma awos bos Pask pur a-varr.

Yma nowodhow da dhe'n Trest Yehes gans charj war dus a Gernow gans kudynnnow dyski. Hwithoryon re dheuth ha mires orth an NHS Partnership Trust ha hedhi musuryow arbennik. Dalleth a wrug an musuryow ma wosa bysmer Klavji Budhek ogas dhe Aberfal. Tus orth an klavji veu skwattytes, pottytes ha gorrys yn kowesow yeyn.

An Parti Livwer a grys alusenow Kernewek dhe gelli peswar warn ugens milvil peuns awos an Olympeks. An Parti re hwithras an kas ha leverel bos an arhans ma gorrys dhe brojektys sport erel.

Ha Pask o arbennik dhe'gan gonisogeth ni... awos bos synsys yn Aberfal an gool Aberfest. An hwarvos ma a worr an wolok war dhons hag ilow a Gernow ha Breten Veur. Dyskansow Kernewek veu synsys hag ow bagas vy, Skwardya, a ganas y'gan taves dy Sadorn. Yth esa troyl meur an kethsem nos na dhe Drenmogh.

Yth eson ow mires orth rygbi lemmyn...

Ha res yw dhyn mires orth diw seythun warbarth drefenn my dhe vos dhe-ves dres Pask...

Dy Sul tressa warn ugens a vis Meurth ha'n Oll-Duyon a gollas erbynn Nottingham ugens-poynt dhe dhewdhek... byttegyns an Vorladron a waynyas erbynn Doncaster tri-foynt-ha-tri-ugens dhe drethek-warn-ugens. Awos an skor na i eth a-wartha ...ha kavos an peswara le yn Kenedhlek Onan.

Nyns o mar dha rag an Vorladron an benseythun yw passyes. I a gollas erbynn Rotherham, ugens dhe dheg. Pennseythun dhrog o dhe'n Rudhyon ... fethys ens gans Otley yn Kenedhlek Dew. Byttegyns, nowodhow gwell o dhe'n Oll-Duyon... i a waynyas poyntow-leun wosa Newbury dhe dhos dhe Bons Polson. Yma govenek dhe'n para bos an skor da a seyth-warn-ugens dhe bymp a wra aga gweres y'ga haskyrgh a witha tyller yn Kenedhlek Onan.

Ha lowen ov derivas dhywgh bos kodhethlians nowydh ow talleth yn Kernewek. Keffrys ha gul Nowodhow an Seythen, yth esov ow pareusi towlen lyver-termyn hag ilow pub seythen ynwedh. Radyo an Gernewegva a vydh kevys orth [kernewegva.podbean.com](http://kernewegva.podbean.com). Henn yw oll rag an seythen ma... bys nessa seythen, tereba nessa.